

A C T I T U D E S

NADA

POR Bizén D'O RÍO MARTÍNEZ

Cuan Antón surtié d'a oficina d'o paro, una begata más sintié a desesperanza que n'os zagueros meses feba presa n'er, ro agobiaba y atosigaba dixándolo decayiu. As garras cuasi no respondeban ta ros impulsos suyizos de querer correr, escapar a priesa d'ixa zona d'a ziñá, que yera muyto conozita por as suyas besitas periodicas n'a busqueda d'un triballo.

Recorriba o trayeuto ta ra pensión solenca y grisa ande moraba y con as mans n'as pochas y ro suyo caminar cansizo, parixeaba un ome estricallau.

As chens presurosas pasaban por o lau suyo y solamén golbeba t'a reyalidá cuan teneba que cruzar as calles rebutiens d'autos que trachinaban d'un lau t'atro.

Con pesadez puyó as escaleretas d'a pensión y entré n'era, encaminándose-ne t'a ra chambreta suyiza, dixó golber a puerta y recullendo a cartiella d'afforros d'o caxón de l'almario se esbrunzó na llit presa d'amargura y desesperanza.

¡Cuántas cosas pansaban por o suyo esmo!

¡Qué poquetas perras m'enquedan! ¡Qué será de yo!

¡Qué fará Marieta! Un atisbo d'esperanza iluminó a suya faz... Marieta... Marieta...

¿Por qué o destino nos-ne ha feito ista jugarreta?

Nusatros no querebamos más que bibir en paz, triballar, casáños y tener una ramadeta de zagals.



¿Qu'imos feito ta merezer tanta tristura?

Una rayadeta de sol penetraba por a chicota finestra n'ixa maitín de primabera y Antón güellaba fito fito o blanquizo resplandor que feba n'o sulero, pero ... yera asorto n'os suyos pensamiens. Un fascal de preguntetas bulliban tresbatientes n'o suyo esmo, un fascal de remeranzas d'a suya bida pasata chunto a ros suyos pays amortaus, que yazeban n'o zimenterio d'aquer lexano lugar n'una bal pirenaica y que bel diya tamién serban cubrius por as auguas, ixas auguas qu'astí n'a capital tanto clamaban y que no crompendeban cómo podéban haber costau sacrefizios a muitas chens.

Pero sobre toz os pensamiens, surtiba a remeranza de Marieta, ixa nobia que tamién se desarraigó ta Cataluña n'a busqueda d'un triballo, de fer unas perretas, mientes ér tropaba triballo n'a zidá, pa poder casáse un diya, formar una familla, pero sobre tó, olbidáse d'as amarguras pasatas y ascomenzipiar una nueba bida.

Atros lo bi-eban feito,

“¿por qué yo no?”

Unas ganas locas d'escribíle a Marieta fazieron presa n'er y recullendo unas fuellas y boligrafo ascomenziipié.

Fablosia 12 d'Abrial de 1978.

Quiesta Marieta:

Izen que de nuastro lugar no en queda cosa, que tóz son ius, Chuso y Carmeta, de casa o piquero, plegoron ta Manresa, ér ye de pion n'una empresa costrutora y por a nuey s'en ba ta una fabrica d'embutius ta fer salchichetas, Carmeta creigo que plora to ro diya remerando o lugar nuastro y ra sepoltora d'a suya may pues le dizieron qu'os espoliadors no dixan cosa por os lugars amortaus de nuestra probinzia.

Eladieta y Nunilo baixaron ta Uesca, pero con as perretas que les endioron por l'aspropiaziόn quasi no bosan o piso y, como ya t'alcordarás, no sapeban fer cosa. Creigo que fan zintetas ta una fabrica, pero o problema, seguntes me dicié Francho, o suyo sobriné, qu'ha alcontrau triballo en Zaragoza, ye que l'azienda publica, u seiga os contrebuzioneros, les-ne piden os atrasos d'a contrebuzión que no bi-eban bosau n'o pueblo, me dicié que fan nobenas y rogautibas a San Chudas, qu'endizan ye l'abogau d'os imposibles, ta beyer si a caixa d'estalbfus les-ne da uno credito a cuenta d'o piso pa poder bosar.



Quino, de casa braguetas, con os zinco fillos se baixó con Olarra, a muller, t'a Balbastro y fazié muyta suerte, o trobé fa unos diyas n'o ambulatorio d'o seguro, pues teneba a los ninones zagueros malos, y me dizié que triballaba n'un forno d'una fabrica en Monzón, que bi-eban teniu problemas pa trobar piso y que remataron con uno d'alquiler en Balbastro y puya y baixa toz os diyas ta Monzón, qu'as poquetas perras que l'endioron as tiene recullías y solamén s'ha crompaun una amoto pa desplazase a triballar. Tamién me dizié qu'a filla mayor, Zilia, en tiene ya catorze añadas y bi-eba dixato o colexio p'aduyar a suya may, que como t'alcordarás ye siempre maliza.

Charramos mucho y m'alegré de beyer a Quino y muyto más cuan me dizié qu'iso qu'endizzen as chens de nuestro lugar de maldizions y maldaus, ye fateras, que Dios ye güeno y nunca sofoca as chens más d'o que ye calero.

Charrando de Dios m'embiene ta capeza izíte que Dn. Chulio, o mosén, creigo ye n'o nuabo lugar, anque seguntos me deziba Chuanito o sacrestán, que triballa n'as brigadas de limpieza en Zaragoza y puya beluns domingos a resacar chabalines pa unos cazataires que son mai-nates y lesne-dan zien duros, pues un diya se trobó con Dn. Chulio, qu'anque do exerze o suyo ministerio ye d'Aragón, le plegan as pastorals d'o suyo Bispe n'atra llengua, diferén d'a nuastra, pero ér beyé isto como uno sacrefizio más que Dios le-ne manda.

¡Cómo s'han trafucau todas as cosas, Marieta!

Si paize que yera ayer cuan nos trobábanos chuntos n'a cadiera dimpués d'o triballo.

Si paize qu'a siu una sueñera lo bibiu enantes.

¡Craro qu'isto ya ro deziba Chustina de casa trabucazo!

¡Si sus paizerá un sueño can os trobeis n'a zidá! ¡S'isto no ye bida! ¡Si tenébanos que rematar d'iste modo!

Pero... güenas llanteras l'endioron a nuey que nos trobamos con a luz curtada y a todas as presonas nos esbentó d'as casas t'as calles a oscuridá.

¡No beigas os abrazos y ploros de tóz!

Antonzes pensé que yera millor que no estieses, que no beyeras as fazes tristas con o craro de luna que paizébamos espantallos o defuntos.

¡Ansí s'amorta un lugar, Marieta!

Güeno, dixemos as tristuras y sigo dándote-ne más notizias.

A Chustina la trobo por as maitins qu'en ba a triballar temprano, escosca unas ofizinas y dimpués ta casa a preparar os almuerzos d'os



zagals y d'o suyo mariu Mariané, triballa de portero n'una casa y paize un marescal, con os botons doraus qu'enleba, pero me deziba un diya qu'a suya bida ye o cambo y ro mon, me contó que d'armita de San Migal, s'han lebau o santo, izen que ye n'o museyo, pero as demás cosetas creigo qu'un diya plegoron unos mesaches con as mochilas ta ro güembro y reculleron tó, agora Anchel o Perolón d'o lugar bezino l'enda uso cuan reculle as crabas, grazias ta ra armita entiene tellau por as nueyas, usea qu'agora ye o suyo cobixo.

¡Qué paradoxa, Marieta, a San Migal tamién l'an espropiau a casa!

Sigo con as miyas credenzias, Marieta, y emboy ta misa os domingos, por zerto qu'o zaguero cuan saliba d'a ilesia me tropé con Dn. Chaime, l'ingeniero que binié cuan l'aspropiaziόn.

¿T'alcuerdas berdaz?

M'alegré muyto, ya que m'amostró una afoto d'o chalé que s'ha feito n'o cobalto d'a solana, n'as tierras que yeran de Mariané y que les-ne bosó a prezio d'espropiaziόn, agún se beyeba nuastro lugar t'abaixo con a fuen ande nos dispidimos cuan marchaste ta Cataluña, me dicié que sapeba que tόz bi-e-banos cobrau y dimpués bi-ebanos feito suerte n'as zidás.

¡Qu'ironiza!

M'escribié Chuso o piquero, dende Manresa, me pediba una partida de naxiu d'o fillo Urbez, que le-ne pidioron n'o colexio d'o mesache y no sapeba ánde pidíla, ni qué teneba que fer.

¿Prexinas o crebadero de capeza?

No sé ande ye agora as documentazions y registros qu'habeba n'o lugar.

Marieta, ixto istá defízil pero aspero que pronto s'arregle tό y podemos achuntάnos pronto.

Mientes recuye as isprisions d'iste que t'enquiere

Antón

Dixó o boligrafo sobre a mesa y lentamén dobliquió os papels escribius, golbió a capeza ta ra finestra y ro sol primaber al l'en die plenamén n'a cara, que s'iluminó como si li traese una rayada d'esperanza, ¡Marieta se mereze tό!, pensó, y con iste pensamién tresbatiente n'o zerebelo entorné os guellos, mientes por a suya faz s'esbaraban furtibas dos glarimas.

